





大明會典卷之一百九

禮部六十七

賓客

會同館

舊設南北兩會同館。接待番夷使客。遇有各處  
 貢夷到京。主客司員外郎主事輪赴會同館。點  
 視方物。譏防出入。貢夷去。復回部視事。弘治五  
 年。各夷來貢者衆。始添設提督會同館主事一  
 員。專一在館提督事務。

凡貢使至館。洪武二十六年定。凡四夷歸化人  
 員及朝貢使客。初至會同館。主客部官隨即到



彼點視正從。定其高下房舍鋪陳。一切處分安妥。仍加撫綏使知。

朝廷恩澤○一下程。分豁正從人數。劄付膳部。五日一次。照例支送酒肉茶麪飲食之物○一管待。量其來人重輕。合與茶飯者。定擬食品卓數。劄付膳部造辦。主客部官一員。或主席。或分左右。隨其高下序坐。以禮管待。仍令教坊司供應。凡番王至京。洪武二年。令禮部官於會同館禮待。永樂以後。四夷來朝貢者。

欽命內官與文武大臣。或學士等官待宴。不拘員數。成化初。北虜東夷。西番。以武職大臣待。朝鮮。安南。日本等國。并土官。以禮部官待○嘉靖三十九年。朝鮮國陪臣到京。禮部題請待宴官。

命禮部尚書待。又泰寧等夷人頭目。

命總督戎政勲臣待。自後夷使到京。俱照例。

凡會同館醫生。遇四夷及伴送人等有疾。即與醫藥。年終具用藥若干。活人若干。開送提督主事處核實呈部。以稽勤惰。考滿陞授。仍留本館辦事。其藥材太醫院關給。

凡兩館事務。夫役。嘉靖十年。令俱屬提督官管。



理。兵部該司不許侵撓干預。其大使等官及別衙門。敢有占用夫役。及脫逃負欠情弊。都聽提督官查究。

### 各國通事

洪武永樂以來設立

御前答應大通事。有都督都指揮指揮等官。統屬一十八處小通事。總理來貢四夷。并來降夷人。及走回人口。凡有一應夷情。譯審奏聞。嘉靖初。革去大通事。其小通事悉屬提督官。凡在館鈴束夷人。入朝引領。回還伴送。皆通事專職。

凡通事額員。成化五年奏定。小通事額數。總不過六十名。遇有病故。及為事等項。革去職役者。照缺選補。若事繁去處。丁憂有過三名者。量補一名。

計四夷一十八處額設通事六十員名

朝鮮國五員名

日本國四員名

琉球國二員名

安南國二員名

真臘國一員名

成化二十年添一名。後以空閒俱不補。



暹羅國三員名

占城國三員名

瓜哇國二員名 後俱不補

蘇門答刺國一員名 後不補

滿刺加國一員名

達達七員名 成化十九年添一名

回回七員名 成化十九年添一名

女直七員名 成化十九年添二名

畏兀兒二員名

西番五員名 成化十九年添一名

河西一員名 成化二十年添一名後俱不補

緬甸一員名 後不補

雲南百夷等處六員名

凡食糧資格。成化七年奏准。通事戴頭巾三年。

滿日送部考中。頂補正缺者。准支米。添設者。雖

經考中。仍作不支米辦事。待有正缺。方許支米。

○十八年定。通事辦事三年。滿日。本部考中。支

米。又辦事三年。滿日考中。送吏部冠帶。又三年。

滿日考中。實授序班。欠通者。許習學半年。再考。

○弘治六年。申明額外添設待缺通事。雖滿三



年六年考中。不許支米。其滿九年未得食糧者。准其食糧。協同辦事。○九年奏准。通事食糧。辦事三年。滿日考送吏部冠帶。如夷語欠通。及有過名誤事者。徑發原籍為民。

凡收充候缺。弘治八年奏准。各國世業并土官土人子孫。情愿告充候缺通事。或邊方訪保生儒人等。該本部考得夷語精通。勘無詐冒者。劄送鴻臚寺收充候缺通事。土官土人子孫。給與養贍食米一石。極邊訪保者。給食米五斗。通候有缺之日。再考題補。其出身資格。仍照舊例。○

凡各處歸順土官子孫。告充通事。補缺三年。奏准給與冠帶辦事。仍候三年。考滿銓選。○嘉靖二十九年題准。通事遇有各館正額名缺。將候缺通事查係類考居一等。方與照依到館名次挨補。其考居二等。及季考雖居一等者。不許槩稱到館在先。援比求進。

凡訪保。成化十八年奏准。各國通事止一名者。訪保一名。不支米辦事。○嘉靖元年奏准。通事丁憂。緣事未結。俱不作缺。其有見缺十人以上。及一國全缺者。照舊行各邊鎮巡官訪保精通。



夷語身家無過。人物齊整。字畫端楷。語音洪亮者。每缺起送一人。前來補考。○十九年議准。通事見缺。訪保送部收考。轉送該寺教習者。俱不得過正額之半。若本國正額止一名者。許收候缺一名。凡遇候缺既盡。正額有缺。許鴻臚寺呈部奏請訪保。照例考滿。不必拘見缺十人。及一國全缺之例。

凡考試教習。嘉靖二十五年題准。禮部會同吏部。將在館通事序班人員。通行考試。分為三等題請。一等照舊在館供事。二等量加罰治。姑容

習學。三等黜退為民。其未經授職通事人等。本部仍各選委年深通事序班。題請照舊教習。每日書寫番漢字語一張。每月朔望責令該館序班考校。月終提督主事考校。季終本部通將各館官員通事人等。參錯出題。嚴加考校。如一年三次考居三等通事人等。本部即時量責。序班等官。年終類題罰治。以後通事食糧冠帶授職等項。仍各案候。俱以三六九年為期。通將各館官員人等。一併嚴加區別考試。其夷語通曉者。許照例遷轉留用。不通者。徑自黜退為民。不許



會典卷一百一十一  
六  
照常扣日。挨資求進。○二十八年題准。各館中  
掄選年深通事曉夷語者一人。立為教師。不分  
有無夷人。每日黎明時。進館督率各該通事人  
等演說夷語。中有未能盡曉者。遇有該邊原來  
伴送通事。許令教師詢訪。務求通曉音字。如三  
年之中。教習有效。候類考之時。具名奏請擢用。  
本部仍置卯簿一扇。行令提督主事。每五日令  
各館官生畫卯。如有不到者。明書于各名之下。  
每月朔望。教師引領生徒。將所習音字抽試數  
字。夷語演說一遍。季終提督官將卯簿對呈本  
部。以憑季考。兼論其勤怠。歲終備開考語。封呈  
本部。以待三年通考。其廉污。季考及三年通考  
之時。必合字與音。相兼考校。

凡考滿。成化十八年奏准。通事序班等官。三六  
九年滿。俱禮部考過夷語精熟。查訪無過。量出  
考語。咨送吏部。六年考察京官之期。亦從本部  
查訪。備開揭帖。徑送考功司。○嘉靖二十六年  
奏准。通事官生。三六九年考滿。該鴻臚寺起送。  
到部者。查無違礙。仍舊取官對考。如果夷語精  
通。准令給由。若夷語欠熟。發回習學。候三箇月



再考。又不稱者。徑自黜退為民。○萬曆四年奏准。通事序班官給由。或遇公差。或發回習學。補考。或候對考官。每遇季終。不拘人數多寡。禮部查明類考。咨送吏部。其緣前各項不能盡如俸滿之期者。須明註咨內。

凡出差。弘治九年奏准。通事出差。違限半年。照例送問。雖有公文。不與准理。違限一年。及養病服闋。二年之上。作缺。待其到京。俱令守缺。不許作協同辦事名色。○十一年奏准。南方海外諸國。不必差官送還。如果原來通事。別有事故。夷

人奏討不已者。禮部奏請定奪。○嘉靖二十九年。題准。番僧貢回。差通事序班。給批定限。送至四川。巡撫衙門交割。止許在省。守候批文。不許跟同前去。○三十三年。題准。暹羅國使臣告稱。驛遞刁難。差通事序班。給批定限。送至福建。布政司交割。○三十八年。題准。女直夷人貢回。還差通事序班。押送出境。○四十三年。題准。通事故縱夷人。詐害驛遞。改行兵部差指揮等官伴送。○萬曆四年。題准。兵部差官。不諳夷語。致各夷沿途生事。益甚。仍差通事序班押送。但有不



自檢飭不能鈐束夷人。許所在官司申呈叅革。凡通事違犯。成化十九年題准。通事有犯贓私。照吏典例。○弘治九年奏准。各國戴頭巾通事。不許遇例上納糧草。及一應經商買賣曠廢職業。違者叅問革役。○嘉靖十七年奏准。在館通事序班。辨歷勤謹。夷語精熟者。該寺具奏量加俸秩。如有恣肆曠廢。唆誘夷人為非。受賄作弊。抗違該司提督官者。俱聽禮部指名叅究。○二十九年題准。通事分撥各館之後。不許夤緣告改別館。違者本部叅究。○三十年題准。通事今後有患病。至一年。給假違限。至六箇月。託病不考。至三次。及不赴畫卯。至三箇月者。官聽本部叅革冠帶。通事以下。聽本部徑自查革。○萬曆七年議准。各館通伴員役。指稱引領交易。替代使用名色。科歛貢夷財物者。禮部悉心體訪。責令提督主事。不時呈報。輕則徑自處治。重則具奏論罪。



大明會典卷之一百九

大明會典卷之一百十

禮部六十八

給賜一

在京官員人等

公差附

登極

凡

皇帝登極賜在京文武羣臣及軍民人等銀絹布鈔。宣德十年。公。銀六十兩。侯。伯。駙馬。五十兩。一品。二品。四十兩。三品。二十兩。四品至五品。遞減五兩。六品至八品。遞減二兩。九品。四兩。雜職。三兩。故侯伯之家及未承襲者各十兩。將軍校尉軍



匠人等。各二兩。優給幼官。并紀錄幼軍。各照本等例減半。辦事官。監生。生員。人材。吏典。陰陽。醫士。樂人。各絹一疋。在京廂民工匠廚役僧道人等。各布一疋。營造山陵軍人。鈔一百貫。乾魚三斤。聽選公差。及四夷朝貢人員。各賜鈔有差。○弘治十八年。公。侯。駙馬。伯。銀二十兩。一品。二品。十五兩。三品。十兩。四品。八兩。五品。六兩。六品。七品。五兩。八品。四兩。雜職。三兩。操備及營操官員皆同。故侯伯之家。及未承襲者。各五兩。優給幼官。及鰥寡老疾軍官。一品。二品。銀六兩。三

品。四兩。四品。五品。三兩。六品以下。二兩。雜職。一兩。優養軍官母妻。見存者。各銀二兩。將軍旗校軍匠。馴象養馬人等。及操備等項旗軍。各銀二兩。紀錄幼軍。各銀一兩。辦事官。監生。生員。天文生。樂舞生。醫生。各絹一疋。在京吏典。知印承差坊廂里老民。匠廚役樂人。各布一疋。聽選公差官員人等。各賜鈔有差。○正德十六年。公。侯。駙馬。伯。銀三十兩。一品。二品。二十五兩。三品。十五兩。四品。十二兩。五品。及七品。遞減二兩。八品。九品。四兩。雜職。三兩。優給幼官。及鰥寡老疾軍官。



一品。二品。銀八兩。三品。五兩。四品。四兩。五品。三兩。六品以下。二兩。雜職。一兩。故侯伯家。及優養軍官母妻以下。俱准弘治十八年例。會試中式舉人。各絹一疋。○隆慶元年。公。侯。駙馬。伯。紵絲。四表裏。文官。一品至九品。各給與應得誥勅。先已給領者。與進應得勳階一等。品同職銜不同者。照見任改給。署職者。與實授。試御史。試中書。候實授。庶吉士。候授官之日。各補給。其有願移封者。聽。若先已移封。今給與本等誥勅。武官。一品。二品。三表裏。三品。二表裏。四品。一

表裏。五品。六品。各紵絲一疋。雜職。絹一疋。試銀。撫百戶。各絹四疋。史館官生。禮部鑄印局儒士。順天府學生。四夷館譯字生。錦衣衛聽差并營操舍人。欽天監天文生。太常寺樂舞生。太醫院醫士。武學官生。每名絹一疋。優給優養官。一品。二品。銀五兩。三品。四兩。四品。五品。三兩。六品以下。二兩。優養軍官母妻。每口銀二兩。將軍旗校。力士。軍匠。馴象。養馬。及操備等項。旗軍。勇士。并營操家丁。每名銀二兩。紀錄旗校。力士。幼軍。每名銀一兩。修理山陵官軍。官。照前給與表裏。絹



疋。軍每名二兩。其已支領者不許重支。各衙門歷事監生。正歷免二箇月。雜歷免一箇月。長差三箇月。見在監者。先造冊送吏部。候撥歷到部之日。照數減免。各衙門辦事官免辦一箇月。知印并各當該吏三箇月。承差并辦事吏二箇月。周歲辦事吏一箇月。罰班官吏。每一年減一箇月。其見在聽撥當該辦事者。吏部各造冊。案候著役之日。照數減免。陰陽人。醫生。順天府坊廂里老。各衙門民匠及廚子樂工。每名綿布一疋。各邊軍。每名銀二兩。差官往各鎮頒給。六年賞如元年例。內增雜職并太常寺冠帶協律郎等官。每員絹二疋。東宮帶刀舍人賞同。東宮各衛侍衛舍人。應襲并書寫應舍。每名絹一疋。翰林院習字生員。三大營侯伯應襲舍人。及內官監冠帶匠役賞同。織染局種藍軍匠。每名銀一兩。

### 纂修

### 凡修

實錄。永樂元年。賜監修官銀一百兩。綵幣六表裏。織金紗衣一套。鞍馬一副。總裁官銀八十兩。綵幣五表裏。織金紗衣一套。鞍馬一副。纂修官銀五



十兩。綵幣四表裏。紗衣一套。催纂兼騰寫官。銀三十兩。綵幣二表裏。紗衣一套。催纂官。銀二十五兩。綵幣二表裏。紗衣一套。騰寫監生生員儒士。各銀十兩。鈔三十錠。綵幣一表裏。騰寫吏。各銀八兩。鈔三十錠。綵幣一表裏。催督騰寫官。鈔二十錠。絹二疋。辦事吏。各鈔二十錠。絹一疋。○弘治四年。賜監修官。總裁官。各銀八十兩。綵幣四表裏。羅衣一套。鞍馬一副。副總裁官。銀八十兩。綵幣四表裏。羅衣一套。纂修官。銀三十兩。綵幣四表裏。羅衣一套。催纂官。銀二十兩。綵幣二

表裏。羅衣一套。騰錄官。銀十五兩。綵幣二表裏。羅衣一套。收掌文籍官。銀十兩。綵幣二表裏。騰錄監生。銀五兩。綵幣一表裏。辦事吏典。鈔二十錠。絹一疋。各色人匠。鈔二十錠。布一疋。官陞擢事故去任。及監生事故去者。又近不一。賞賚有差。○嘉靖四年。賞如弘治四年例。惟纂修官。收掌文籍官。各減一表裏。續添騰錄官。賞如監生。○萬曆二年。賞如嘉靖四年例。其羅衣一套。折衣羅三疋。收掌官。賞銀十五兩。綵幣二表裏。折衣羅三疋。史館騰錄官。銀十兩。綵幣一表裏。譯



字官生。生員賞如監生。史館官吏及校尉賞如辦事吏典。貼寫官吏賞如各色人匠。○五年增稽考參對官。內侍郎賞如纂修官。修撰等官賞如收掌官。

凡修

王牒。萬曆四年。賜內閣元輔銀四十兩。大紅紵絲四表裏。新鈔五千貫。次輔各銀三十兩。大紅紵絲三表裏。新鈔三千貫。修校官各銀二十兩。大紅紵絲一表裏。新鈔二千貫。查對官銀十五兩。膳錄官各銀十兩。俱大紅紵絲一表裏。新鈔一

千貫

經筵

凡

經筵初開。知經筵同知經筵。并侍班官各賜銀五十兩。綵幣四表裏。鈔五千貫。通政大理侍班官。并講書官各銀三十兩。綵幣二表裏。鈔三千貫。展書官各銀二十兩。綵幣一表裏。侍儀并寫講章官各銀十兩。紵絲一表裏。俱鈔一千貫。大漢將軍各絹一疋。仍

特賜閣臣蟒衣一襲。日講官各大紅織金羅衣一襲。



或冠帶無常

視學

成化元年。

駕幸太學。後三日。賜襲封衍聖公大紅織金麒麟紵絲衣一套。犀帶一條。紗帽一頂。顏孟二博士。青織金雲鷺紵絲衣一套。玳瑁帶一條。紗帽一頂。三氏族人。俱素紵絲衣一套。講官祭酒司業。各照官品。大紅織金紵絲衣一套。羅衣一套。監丞以下。各青織金紵絲衣一套。監生鈔各五錠。吏典二錠。後俱如例。

耕藉

弘治元年。賜終畝農人。各布一疋。萬曆八年。賜三公九卿紵絲一表裏。牽牛老人六名。各布二疋。從耕老人三十六名。各布一疋。教坊司官五員。各銀一兩。念禾詞官人二十二員。各銀五錢。執旗俳色長三百一十三名。各銀三錢。

大閱

遣閱營操附

隆慶三年。

大閱前三日。賞軍士銀每名三錢。閱射分四等。其一等馬步箭全中者。官賞銀十兩。銀牌一面。紵



絲二疋。折銀五兩。內平日無過有薦者。仍紀錄起用。軍賞銀一兩。紅布三疋。折銀一兩。馬全中。步中四五箭者。官賞銀五兩。銀牌一面。色段二疋。折銀三兩。內無過者。亦紀錄敘用。軍賞銀一兩。紅布一疋。折銀三錢。馬步二箭至三箭者。官賞銀三兩。銀牌一。面色紗一疋。折銀一兩。軍賞銀一兩。二等馬二箭。三箭步一箭者。官賞銀一兩五錢。銀牌一。面。軍賞銀四錢。其三等馬中而步不中。或步中而馬不中。官准策勵供職。軍免責治。若馬不中。步中三四箭以上者。賞如二等。

其四等馬步俱不中。公侯伯罰住祿米三箇月。錦衣衛并各衛願射官。罰俸三箇月。營中將領等官。罰俸半年。內有過者革任。軍照例決打。若係教師家丁。仍革支月糧一石。軍士放火器舞刀鎗鈎鑷。亦分四等賞罰。頒賞之日。仍賞總協戎政大臣各銀二十兩。紵絲三表裏。巡視京營科道各銀十兩。一表裏。

凡遣官閱視團營官軍。嘉靖二年。令馬步中箭一等者。俱賞鈔三百貫。劣等罰俸。

凡團營操演步射火銃。俱懸銀牌。每一面三錢。



中即賞之

冊立東宮

弘治五年。文武官各分五等。一等賜紵絲二表裏。二等至四等。一表裏。五等。紗一疋。南京同。公差等項官亦同。京衛外衛。見操官軍及侍衛帶刀直宿。錦衣府軍等衛。御馬監并武驤左等四衛官舍將軍旗軍勇士。

午門等門并正陽等九門官軍。各銀一兩。錦衣等衛所官。各絹一疋。力士旗校軍奴并監局軍匠各米一石。

內府軍廚民匠。太常光祿寺廚役。各米七斗

節令 時鮮附

洪武十六年令。在京文武官吏人等。正旦元宵節。錢支與胡椒斤兩不等。○十七年令。冬至節。錢支鈔不等。○二十二年。重定賞例。公。侯。伯。鈔十錠。武職。一品。二品。七錠。三品至八品。五錠。文職。二品至六品。六錠。七品至九品。三錠。未入流官。二錠。監生。一錠。俳色。長。一錠。樂工。二貫。樂舞生。二貫。各寺首座住持。一錠。衆僧一貫。○二十六年令。



聖節在京官吏監生軍民僧道並賜鈔近例惟閣臣及日講官或

特賜銀幣有差○永樂二十二年令

皇親遇節令照例賜鈔若大臣不預宴公侯伯都督尚書賜鈔一千貫侍郎五百貫宣德正統以後遇節令文武官及外夷人員并國師以下除有宴外其餘官吏人等俱照例關支節錢官并監生鈔一錠儒士知印吏典僧道樂工二貫若奉

旨免宴關與節錢大小官員各鈔一錠遂為定例○嘉靖七年賜文武官制錢當鈔公侯并一品二

百文內閣衍聖公張真人同二品三品一百文四品至六品九十文七品至九品七十文其餘及朝覲官吏錢鈔中半鈔一貫折錢二十一文凡端午節文武百官俱賜扇并五綵壽絲縷大臣及日講經筵官或別賜牙邊扇并綵絲艾虎等物各以品級為等嘉靖中內閣輔臣吏禮二部尚書及日講官講衍義官又別賜川扇有差凡各處歲進時鮮如鮓魚笋藕枇杷楊梅之類賜文武大臣及日講官各以品級為等

慶賀



凡各

王府差來進表箋人員。每人賜盤纏鈔一錠。南京并在外三司官及諸司差來人員。各五錠。各王府差來進禮物人員。二十錠。其王府內外官員。每員

內府別給綵段一表裏。鳳陽等處

皇陵祠祭署官員社長土民陵戶女戶人等。朝賀到京。鈔十錠。南京并三司官進表回。辭朝。別賜鈔。出自

特恩

陪祭扈從

凡

聖駕初祭

南郊。賜陪祀官大紅織金紵絲衣。初謁

陵。大閱。賜內閣蟒衣等服。色及鸞帶。金銀瓢。繡袋。無

常。文武大臣。日講官。侍從。供事官。綵幣。鸞帶等

物。有差

以後不賜。若閣臣初次不預。後扈從者補賜。

大臣特賜

凡文武大臣考滿。有賜羊酒鈔錠者。以品級為等。或賜宴及



勅諭者出自

特恩

凡文武大臣患病有賜羊酒米蔬等物文職大臣致仕有

賜勅及銀幣等物者皆出

特恩

給假

凡

日講官以省親省墓等項給假例賜白金綵幣鈔錠其在京官員給假省親賜路費鈔一品二品

五千貫三品四千貫四品三千貫五品二千貫六七品一千貫八九品并雜職五百貫

公差

凡總兵鎮守提督巡撫等官辭朝例賜銀幣寶鈔等物各以事之輕重為等

凡文武大臣奉

旨勘事回還及督工選軍審囚等項事畢賜鈔幣羊酒等物各以事之輕重為等

功賞

各處獲功鎮巡總兵等官俱從兵部咨開



欽賞數目到部銀兩行司禮監表裏行內承運庫關  
出付公差人員齎給。其官旗軍舍人等亦從兵  
部奏定加賞給賞量賞。詳在武選司移咨到部仍查  
各地方賞格關出付公差人員齎給。各巡撫衙  
門造冊奏繳。仍咨禮部查考。○嘉靖四年題准  
功賞數少。付公差人員順齎。遇有數百兩以上。  
綵段數百疋以上。本部照例委官一員齎去交  
割。各處巡撫官仍將領過賞賜年終造冊類報  
○隆慶二年題准。  
欽賞銀兩表裏等件。通發各該總督巡撫衙門投驗

給散。除總兵官具疏謝

恩外。三司將佐等官將領過賞賜申報督撫衙門。造  
冊類奏。其赴部領賞員役。驗有彼處真正批文。  
方准給發。將原批上填寫數目。用印鈐蓋。各該  
督撫衙門年終將給散過各官數目姓名。類冊  
奏報。仍咨禮部。以憑查考。受賞人員。或以事到  
京。許親告領。仍取領狀附卷。若陞去新任地方。  
聽督撫官轉齎新任處督撫衙門。一體查給。類  
冊奏報。每年三月終。通將前一年賞賜無回報  
者。咨行各該督撫稽查。未到者。即拘原役究問。



仍通將已到未到備咨禮部查考○萬曆六年  
題准功賞銀年遠無人關領者交還內庫

雜給

凡

王府求討書籍藥材等物及書院樓堂等名皆請  
自

上裁大臣亦間有賜者俱屬祠祭司掌行

凡

親王為本府承奉請給服色查其年久勤勞有功  
請自

上裁年勞不及者不與

凡欽天監觀象臺官生弘治元年奏定每二年  
一次給與禦寒毛襖冬初具題行工部關領

凡大漢將軍襯甲服色舊例五七年一次換給  
正德十三年令三年一給每四員名共大紅紵  
絲五表裏紗羅同

凡在京軍民家選中侍女進入

內庭者嘉靖二十六年准收充女戶食糧免差仍  
各賞銀五兩段一疋

王府

回賜附



凡

登極。成化二十三年。

賜親王。一等銀三百兩。紵絲十五表裏。羅十五表裏。紗十五疋。錦三疋。鈔二萬貫。二等銀三百兩。紵絲十表裏。羅十表裏。紗十疋。錦三疋。鈔二萬貫。三等銀二百兩。紵絲十表裏。羅十表裏。紗十疋。錦三疋。鈔一萬貫。○正德十六年。

賜親王。一等銀五百兩。紵絲二十五表裏。羅二十五表裏。紗二十五疋。錦五疋。新鈔二萬貫。二等銀四百兩。紵絲二十表裏。羅二十表裏。紗二十

疋。錦四疋。新鈔二萬貫。三等銀四百兩。紵絲二十五表裏。羅十五表裏。紗十五疋。錦四疋。新鈔二萬貫。四等銀三百兩。紵絲十五表裏。羅十五表裏。紗十五疋。錦四疋。新鈔一萬貫。

凡

皇子誕生。嘉靖十二年。

賜親王。一等大紅織金五綵團龍常服。紵絲一襲。紗一襲。羅一襲。二等大紅織金閃色團龍常服。紵絲一襲。紗一襲。羅一襲。三等大紅織金團龍常服。紵絲一襲。○十五年。



賜親王。一等織金五綵常服紵絲一襲。白金三百兩。彩段十表裏。二等織金常服紵絲一襲。白金二百兩。彩段八表裏。三等織金常服紗一襲。白金一百兩。彩段六表裏。○十六年。

賜親王。一等織金五彩常服羅一襲。白金一百兩。彩段六表裏。二等織金常服羅一襲。白金八十兩。彩段四表裏。三等織金常服羅一襲。白金五十兩。彩段二表裏。○萬曆十年。

賜親王。各大紅織金閃色團龍常服紵絲一襲。紗一襲。羅一襲。管理

親王府事者與

靖江王。各大紅織金團龍常服紵絲一襲

凡冊立

東宮。成化十一年

賜親王。一等銀二百兩。紵絲八疋。紗八疋。羅八疋。錦四段。生熟絹十六疋。高麗布十疋。白模絲布十疋。西洋布十疋。二等銀一百兩。紵絲六疋。紗六疋。羅六疋。錦四段。生熟絹十二疋。高麗布六疋。白模絲布六疋。西洋布六疋。○嘉靖十八年。賜親王。一等銀三百兩。紵絲十疋。紗十疋。羅十疋。



錦四段。生熟絹三十疋。高麗布十疋。白模絲布  
十疋。西洋布十疋。二等銀二百兩。紵絲八疋。紗  
八疋。羅八疋。錦四段。生熟絹十六疋。高麗布六  
疋。白模絲布六疋。西洋布六疋。三等銀一百兩。  
紵絲六疋。羅六疋。錦四段。生熟絹十二疋。高麗  
布六疋。白模絲布六疋。西洋布六疋。○隆慶三  
年。

賜親王各銀二百兩。紵絲八疋。紗八疋。羅八疋。錦  
四段。生熟絹十六疋。高麗布六疋。白模絲布六  
疋。西洋布六疋。管理

親王府事者與

靖江王各銀一百兩。紵絲六疋。羅六疋。錦四段。生  
熟絹十二疋。布同前

凡

蜀王府進扇。回賜銀三百兩。大紅金綵常服三襲。  
若係世子。改綵段四表裏。銀同。差來人。賞鈔五  
百貫



大明會典卷之一百十

大明會典卷之一百十一

禮部六十九

朝廷給賜番夷及官員人等或出

特恩。或夷人求討。或禮部酌請。其例不一。今具列其可考者于後

洪武二十六年定。凡諸番四夷朝貢人員及公侯官員人等。一切給賜。如往年有例者。止照其例。無例者。斟酌高下等第。題請定奪。然後禮部官具本奉聞。關領給賜。○凡賞賜金銀鈔錠疋帛之類。金銀請長隨內官關領。疋帛係內承運



庫收貯。冠帶衣靴。係工科工部官收掌。鈔錠。係戶部官。分投關領。其物或於

奉天門。或

奉天殿丹陛。或

華蓋殿。用卓頓放。引受賜人朝北立。置物於前。受賜人叩頭畢。以物授之。如多至十人百人。則先以所賜之物。唱名分授。各人行列叩頭畢。於該科出帖赴

午門倒換勘合。照出所賜之物。復令次日謝

恩

近年賞賜公侯官員人等。於

會極門頒給

朝鮮國。洪武間。賜國王大統曆。及錦繡絨綺。王母妃。金綺紗羅。相國等官。綵段紗羅。又賜廟社樂器。永樂間。給國王冕服九章圭玉。佩玉。五經四書春秋會通。大學衍義等書。王父紵絲紗羅。妃珠翠七翟冠。紅紵絲大衫。素紵絲圓領霞帔。金墜。又給綾絹茄藍香帽珠。鍍金銀匣象牙犀角。通鑑綱目列女傳等書。腦麝沉檀白花蛇等藥。又賜編鐘編磬各十六。瑟笙各二。琴簫倍之。正統間。給遠遊冠。絳紗袍翼善冠。龍衮。玉帶。本



國奏請弓材牛角。准歲買五十枝。又准歲買弓面二百。不得過數。嘉靖中。奏請收買樂律及行太常寺校定。令御用監製十二管給之。○差來進貢陪臣賞織金紵絲衣一套。綵段四表裏。絹五疋。書狀通事押物等官。每人素紵絲衣一套。綵段二表裏。絹二疋。布一疋。從人絹衣一套。布一疋。陪臣以下各靴襪一雙。差來謝。

恩者賞同。○差來奏事陪臣賞織金羅衣一套。綵段二表裏。絹二疋。通事每人素羅衣一套。綵段一表裏。布二疋。從人絹衣一套。布一疋。靴襪同前。

○送回人口。給賜國王銀一百兩。錦四段。紵絲十二表裏。寫。

勅獎勵。○漂流夷人到京。給薪米外。仍各給胖襖一件。鞞鞋一雙。如夏月。改給木綿布衣二件。

日本國。永樂間。賜國王冠服。紵絲紗羅金銀古器書畫等物。宣德十年。回賜國王。紵絲二十表裏。紗羅各八疋。錦二段。銀二百兩。妃銀一百兩。成化二十年。回賜國王。紵絲二十表裏。紗羅各二十疋。錦四段。銀二百兩。王妃。紵絲十表裏。紗羅各八疋。錦二段。銀一百兩。○差來正副使。每



員金襴袈裟一領。鍍金銀鈎環全。羅直裰一件。羅褊衫一件。紵絲二疋。紗羅各一疋。絹六疋。銅錢一萬文。靴鞢各一雙。居座以下土官。從僧通事。從人。有差。○正貢外。使臣自進。并官收買。附來貨物。俱給價。不堪者。令自貿易。

琉球國。洪武十六年。賜國王文綺等物。山南王亦如之。後賜中山王。山南王。山北王。紵絲紗羅冠服。王妃。紵絲羅。王姪王相。寨官。絹公服。後又回賜國王。錦四段。紵絲羅各六疋。紗八疋。王妃。錦二段。紵絲紗各四疋。○差來王舅。綵段四表。

裏羅四疋。紗帽一頂。釵花金帶一條。織金紵絲衣一套。靴鞢各一雙。長史使者。每員綵段二表。裏折鈔綿布二疋。通事。每員綵段一表。裏折鈔綿布二疋。從人。每名折鈔綿布二疋。留邊使者。通事。從人。賞同。○正貢外。附來貨物。官抽五分。買五分。

安南國。洪武元年。賜國王大統曆及綵段等物。景泰二年。照朝鮮國。宣德十年。例給賜綵段十表。裏錦四段。嘉靖二十年。改都統使。令廣西布政司。每年印給大統曆一千本。二十一年。令都



統使仍照安南國王例給賞。萬曆四年。以慶謝補貢。回賜。例外加綵段四表裏。錦二段。○差來陪臣。每員綵段二表裏。紗羅各一疋。織金紵絲衣一套。折鈔絹五疋。靴鞵各一雙。行人從人有差。

真臘國。洪武六年。賜國王。大統曆及綵段等物。景泰三年。賜王。錦二段。紵絲六疋。紗羅各四疋。王妃。紵絲四疋。紗羅各三疋。○差來頭目并通事總管。火長衣服。紵絲絹布有差。

暹羅國。洪武間。賜國王。大統曆及織金紵絲紗羅等物。永樂十五年。給王。錦四疋。紵絲紗羅各十疋。內各織金四疋。王妃。紵絲紗羅各六疋。內各織金二疋。宣德間。各減半。正統以後。俱照永樂十五年例。○正副使臣。初到。每人織金羅衣一套。靴鞵各一雙。未經冠帶者。給紗帽素金帶。先曾到京冠帶者。換給釵花金帶。正賞。紵絲羅各四疋。折鈔絹二疋。綿布一疋。織金紵絲衣一套。通事人等。初到。每人素羅衣一套。靴鞵各一雙。未經冠帶者。給紗帽素銀帶。先曾到京冠帶者。換給釵花銀帶。正賞。紵絲羅各二疋。折鈔絹



一疋。素紵絲衣一套。番伴初到。每人絹衣一套。靴鞵各一雙。正賞折鈔綿布一疋。胖襖袴鞋各一副。其存留廣東。有進貢者頭目人等。每人賞素紵絲衣一套。紵絲羅各二疋。從人。每人紵絲絹衣一套。紵絲一疋。番伴人等。每人折鈔綿布一疋。胖襖褲鞋各一副。○使臣人等進到貨物。例不抽分。給與價鈔。

占城國。洪武二年。賜國王。大統曆。使臣文綺紗羅各一疋。仍給冠帶。永樂元年。賜國王。錦二疋。紵絲六疋。紗羅各四疋。王妃。紵絲四疋。紗羅各

三疋。後照此例。○差來王弟王孫初到。賞織金羅衣。并紵絲衣各一套。正賞紵絲六疋。紗羅各四疋。紵絲衣一套。折鈔絹二疋。正副使。初到。每人織金羅衣一套。正賞絲段四表裏。絹二疋。折衣絲段二表裏。正副通事至正象奴等。初到。每人賞素羅衣一套。正賞絲段二表裏。折鈔絹一疋。折衣絲段一表裏。從人。初到。每人絹衣一套。正賞折鈔綿布一疋。折衣絹四疋。俱與靴鞵各一雙。其正副使通事人等。給賜冠帶。及給換例。與暹羅國同。正將士大頭目。及舍人辦事火長



總管幹事各項。正者每名各烏紗帽一頂。黑角帶一條。

爪哇國。永樂初。賜東西王。紵絲紗羅帳幔。手中羊酒器皿。王妃。紵絲紗羅手巾等物。正統三年。賜王。紵絲十疋。紗羅各三疋。妃。紵絲六疋。紗羅各二疋。景泰三年。因王求討。給傘蓋一把。蟒龍衣服一領。○使臣通事頭目人等。初到。賞織金素羅衣服靴襪。正賞紵絲紗羅絹布。女使并女頭目俱同。○貢物給價。

彭亨國。洪武十一年。賜國王。王妃。紵絲紗羅共

四十八疋。使臣織金絲段衣服有差。

百花國。洪武十一年。賜國王。及使者。織金絲段紗羅衣服有差。

三佛齊國。洪武四年。賜國王。大統曆及絲段紗羅。使臣紗羅絲段有差。六年。賜國王。絲段紗羅二十四疋。正使三人。各二疋。衣一套。副使二人。各一疋。通事以下。布帛有差。十年。給王。及使臣。織金絲段紗羅靴襪等物。有差。

淳泥國。洪武四年。賜國王。織金絲段紗羅。及使者。綺帛。有差。永樂六年。王來朝。給冠帶襲衣。王



子襲封還國。賜金鑲玉帶一條。金百兩。銀三千兩。及錢鈔錦綺羅衾褥帳幔器皿等物。王母王叔以下各有賜。○正貢外。附帶貨物。俱給價。

蘇門答刺國。永樂三年。賜國王綵段襲衣。宣德六年。賜錦二段。紗羅各四疋。絹十三疋。妃。紵絲五疋。紗羅各四疋。絹六疋。進馬。回賜綵段二十表裏。後照此例。正使賞綵段五表裏。紗羅各一疋。折鈔絹四疋。通事頭目使臣妻等。各賞有差。○正貢外。使臣人等自進物。俱給價。

蘇祿國。永樂間。賜國王紗帽。金鑲玉帶。釵花金

帶。金蟒龍等衣服。金銀鈔。紗。珍珠。錦。紵絲。紗。羅。器皿。鋪陳等物。王妃冠服。銀鈔。紵絲等物。王男女親戚頭目使女冠帶衣服諸物。各有差。○貨物例給價。免抽分。

西洋瑣里國。洪武三年。以其國來朝。涉海道遠。賜賚甚厚。永樂元年來朝。附載胡椒等物。皆免稅。

瑣里國。洪武五年。賜國王大統曆。及織金綵段。紗羅各四疋。使臣。綵段。紗羅各二疋。僬從。高麗布各二疋。



古里國。永樂間。賜國王。王妃。紵絲紗羅等物。  
淡巴國。洪武十年。賜國王。織金綵段紗羅。使臣  
綵段襲衣等物。有差。

滿刺加國。永樂三年。賜國王。綵段襲衣。九年。王  
來朝。賜錦繡龍衣二套。麒麟衣二套。及金銀器  
皿。幃帳。裯褥。王妃。及其子姪。陪臣。僮從。綵段紗  
羅襲衣。有差。王還國。賜金鑲玉帶一條。儀仗一  
副。鞍馬二匹。金百兩。銀五百兩。鈔四十萬貫。銅  
錢二千六百貫。錦綺紗羅三百疋。絹一千疋。金  
綺二疋。織金文衣二件。王妃。冠服一副。及銀鈔

錦綺紗羅等物。陪臣賞賜。有差。以後定例。回賜  
國王。綵段十表裏。紗羅各四疋。錦二疋。王妃。綵  
段五表裏。紗三疋。差來正副使。并頭目。初到。每  
人賞織金羅衣一套。靴鞵各一雙。正賞。綵段四  
表裏。紗羅各二疋。折鈔絹四疋。織金紵絲衣一  
套。通事總管人等。初到。每人素羅衣一套。靴鞵  
各一雙。正賞。綾三疋。折鈔絹六疋。素紵絲衣一  
套。番伴。初到。每人絹衣一套。靴鞵各一雙。正賞  
折鈔絹二疋。綿布二疋。胖襖褲鞋各一副。其正  
副使通事人等。給賜冠帶。及給換例。與暹羅國



會典卷一百一十九  
同○正貢外。附來貨物。皆給價。其餘貨物。許令貿易。

娑羅國。永樂四年。賜國王。紵絲紗羅共十六疋。織金大紅錦手巾一副。王妃。紵絲紗羅共八疋。正副使并從人。鈔紵絲羅并衣服靴鞵。

阿魯國。永樂五年。差中官給賜頭目。紵絲紗羅共十疋。

小葛蘭國。永樂五年。差中官給賜頭目。紵絲紗羅共十一疋。

榜葛刺國。永樂三年。賜國王。紵絲紗羅各四疋。

絹八疋。王妃。紵絲紗羅各三疋。絹六疋。十二

給國王。錦四段。綾六十疋。頭目人等。給賞有差。

錫蘭山國。宣德八年。賜國王。紵絲十八疋。紗四

疋。王妃。紵絲八疋。紗四疋。正使。正賞。綵段八表

裏。折鈔絹十疋。紗羅三疋。織金紵絲衣一套。副

使。正賞。綵段四表裏。折鈔絹七疋。紗羅各二疋。

織金紵絲衣一套。通事番伴人等。給賞有差。○

使臣人等。自進物。俱給價。

呂宋國。洪武五年。賜國王。織金綵段。紗羅。使臣并從人。俱與瑣里國同。萬曆四年。以助討逋賊。



會典卷三十一  
正賞外。加賜如朝鮮國送回人口例。

迤北韃靼及瓦剌。永樂宣德中。賜瓦剌順寧王。綵段十表裏。妃五表裏。頭目一等者五表裏。二等至四等者四表裏。正統二年。賜韃靼虜王。綵段十五表裏。虎班絹十疋。妃八表裏。頭目一等者八表裏。二等六表裏。三等五表裏。四等四表裏。外有加賜。六年。賜迤北太師段絹。與虜王同。其妻每口五表裏。一等二等數內頭目。每人加賜織金綵段一表裏。天順以後。一等二等者不加賜。三等者俱二表裏。差來正副使。每人賞織金

衣一套。靴鞞各一雙。其後定例。一等正副使。每人綵段六表裏。絹五疋。二等使臣。綵段四表裏。絹三疋。三等綵段二表裏。絹二疋。四等綵段一表裏。絹一疋。俱與紵絲衣一套。紅氍帽一頂。靴鞞各一雙。數內婦女不與紅氍帽。使臣自進中等馬。每匹綵段二表裏。折鈔絹二疋。下等馬。綵段一表裏。絹八疋。折鈔絹一疋。下下等馬。綵段一表裏。絹六疋。折鈔絹一疋。帶進在彼頭目馬匹。不分等第。每匹綵段二表裏。○給賜在彼頭目。一等每人綵段八表裏。二等六表裏。三等三



表裏四等。二表裏。內一等二等緊要頭目。加賜織金綵段一表裏。○回賜永樂九年。回賜順寧等王。上等馬者。各綵段十表裏。海青一連。四表裏。白狐皮二十七箇。四表裏。宣德間。回賜順寧王。及使臣人等進馬。中等者。每匹綵段二表裏。折鈔絹二疋。下等者。紵絲一疋。絹八疋。折鈔絹一疋。下下者。絹六疋。折鈔絹一疋。駝。每隻三表裏。折鈔絹十疋。中途寄留倒死。新生駒馬。每匹絹三疋。折鈔絹半疋。駝。每隻絹六疋。折鈔絹一疋。海青一連。一表裏。銀鼠皮二百箇。十二表裏。

貂鼠皮二箇。絹一疋。青鼠皮十箇。絹一疋。土豹一箇。絹七疋半。正統元年。回賜使臣銀鼠皮。每六箇。絹一疋。玉石。每一斤。絹一疋。二年。回賜虜王。及頭目使臣人等馬。每匹綵段二表裏。貂鼠皮五十箇。四表裏。使臣者。每二箇。絹二疋。銀鼠皮五十箇。二表裏。白兔皮三箇。絹一疋。白狐皮一箇。絹一疋。小廝一名。二表裏。三年。貂鼠皮。每十箇。綵段一表裏。四年。貂鼠皮。每三箇。絹一疋。使臣人等。到京續進馬。俱照下等馬例。回賜。五年。回賜銀鼠皮。與熟紅絹。六年。青鼠皮。每二十



箇絹一疋。使臣人等馬分三等。虜王并太師馬不分等第。八年。太師阿魯骨馬。每匹綵段六表裏。使臣馬。每匹四表裏。絹八疋。九年。進西馬者。每匹綵段五表裏。絹十疋。撒哈刺。每段絹九疋。十二年。阿魯骨馬。每匹四表裏。○求討在彼頭目。一等二等并三等。內有係虜酋親及親信用事者。俱請

旨給賜。弘治三年。三等以下。不給賜。差來使臣。自元年。至三年四年。俱有

特賜。○會同館開市。禮部出給告示。除違禁物。不許貿易。其段絹布疋。聽於街市。與官員軍民人等。兩平買賣。正統十年。許買賣五日。十二年。許瓦剌使臣賣馬。景泰元年。許買銅湯瓶。鍋。紅纓鞍。轡。剪子等物。

順義王及套虜。嘉靖三十年。虜酋貢馬。賞金頂大帽。綵段衣服。隆慶四年。執叛人來獻。賞綵段四表裏。布一百疋。五年。虜酋順義王。奉表獻鞍馬。賞大紅蟒。白澤。各紵絲衣一襲。綵段十五表裏。妻。大紅。五綵紵絲衣二套。綵段四表裏。親弟及長子都督同知。各綵段八表裏。闊生絹二疋。



五綵紵絲衣一套。木綿布四疋。孫指揮使。綵段五表裏。織金紵絲衣一套。絹布同。各枝指揮同知千戶百戶等官。各綵段三表裏。織金紵絲衣一套。絹一疋。布同。差來夷使內小頭目。各綵段二表裏。素紵絲衣一套。布二疋。散夷。減素紵絲衣。段布同。撰表夷。賞如各枝例。虜王。

賜勅獎諭。是年虜王又遣使代套酋。都督同知貢馬。賞大紅白澤紵絲衣一襲。綵段八表裏。套酋都督同知及指揮同知以下。并差來小頭目散夷。各賞如例。虜王仍。

賜勅獎諭。又以套酋監市。効勞賞綵段四表裏。五綵紵絲衣一套。次酋綵段二表裏。織金紵絲衣一套。六年虜王增獻鞍馬弓矢。賞大紅蟒白澤獅子紵絲衣各一套。綵段二十三表裏。妻賞如例。萬曆三年。以虜王能約束諸部。五年無警。加賞銀三十兩。紵絲蟒衣一襲。綵段八表裏。後每五年加賞一次。又虜王虜官每枝給。

勅一道。共七道。○回賜隆慶五年。順義王進上馬三十匹。每匹綵段二表裏。闊生絹一疋。以初貢加綵段一表裏。留邊馬四百七十九匹。聽該鎮。



支馬價銀五千兩給賞。套虜進上馬二十四匹。每匹綵段三表裏。闊生絹一疋。留邊馬一百八十八匹。支各鎮兵餉銀一千八百兩給賞。六年議准。上馬給段絹外。每匹加銀五兩。留邊馬每匹銀十兩。○求討。隆慶六年。順義王奏請。番僧與金字經五部。墨字經五部。差番僧二人。齎赴虜庭。併為傳誦。其差去番僧。先行順天府。各給衣食銀十兩。差回。給賜禪衣坐具。併紵絲。番僧衣一套。靴鞵各一雙。帶去番官。綵段二表裏。木綿布四疋。

朶顏。福餘。泰寧。三衛。差來并自來。都督賞綵段四表裏。絹二疋。都指揮。綵段三表裏。絹二疋。指揮。千百戶。所鎮撫頭目。每人綵段二表裏。絹一疋。各織金紵絲衣一套。又各加綵段一表裏。舍人。每人綵段二表裏。絹一疋。織金衣一套。達子。每人綵段一表裏。絹一疋。素紵絲衣一套。婦女。有進貢者。每人一表裏。絹一疋。紵絲女衣一套。隨來婦女。一表裏。絹一疋。絹女衣一套。以上靴鞵各一雙。奏事進貢。都指揮。絹二疋。綵段三表裏。織金衣一套。指揮。每人絹一疋。綿布一疋。綵



段二表裏紵絲衣一套靴鞢各一雙舍人因事進貢者每人綵段一表裏織金衣一套絹一疋靴鞞各一雙嘉靖二十四年以朶顏都督能鈐束夷人不擾邊境准與金帶及金頂大帽○回賜自進并帶進馬匹不分等第每匹綵段二表裏絹一疋駝每隻三表裏絹十疋在衛都督都指揮每員加賜綵段一表裏○求討請旨量與物件到京者照名給散在衛者請

勅開付差來人領去○領賞畢日許於會同館開市三日鋪行人等照例將貨入館兩平交易順天府仍行薊州遵化等處如三衛夷人回還到彼聽令兩平交易每人許收買牛一隻犁鏵一副鍋一口不許將違禁之物私自夾賣違者巡按御史究治

東北夷女直進貢到京都督每人賞綵段四表裏折鈔絹二疋都指揮每人綵段二表裏絹四疋折鈔絹一疋各織金紵絲衣一套指揮每人綵段一表裏絹四疋折鈔絹一疋素紵絲衣一套以上靴鞞各一雙千百戶鎮撫舍人頭目每人折衣綵段一表裏絹四疋折鈔絹一疋奏事



來者每人紵絲衣二件。綵段一表裏。折鈔絹一疋。靴鞵各一雙。嘉靖十年奏准。女直進貢賞賜視

勅書官職為隆殺。其有洗改職銜者。將應得賞賜減一等。原無

勅書者。止與舍人賞賜。各番夷倣此。四十三年題准。女直正賞綵段絹疋。俱准折給銀兩。○回賜進過馬。每匹。綵段二表裏。折鈔絹一疋。貂鼠皮。每四箇。生絹一疋。零者。每箇布一疋。嘉靖六年題准。馬價綵段一疋。折給銀三兩。十三年議准。

俱與折給。○求討。弗提衛都督奏討冠帶蟒衣。欽賜大帽一頂。金帶一條。後又奏討。特與蟒衣一件。建州左衛都督奏討大帽金帶。亦准與。嘉靖三年。毛憐衛都督奏討大帽金帶。查已授職三年。准與。後未及三年者。皆立案。六年。令夷人止許穿用原賞花樣衣服。不許因而自行收買。如違買者。賣者皆治罪。後奏討蟒衣者。皆立案。○賞賜畢日。許於會同館開市三日。



大明會典卷之一百十一

大明會典卷之一百十二

禮部七十

給賜三

外夷下

西

西域哈密永樂四年賜忠順王紵絲六十疋。絹二百一十四疋。祖母母妃各紵絲六疋。絹六疋。嬪母紵絲四疋。絹四疋。六年賜王紵絲五十疋。絹二十疋。織金紵絲衣三套。皂鹿皮靴二雙。羶鞞二雙。祖母母并妃各綵段六表裏。成化三年故忠順王外孫為都督。賜銅印并織金衣一套。八年其都督赴京襲職。除馬駝給價外。加賞綵



段一表裏絹一疋。織金紵絲衣一套并靴鞵各一雙。進貢到京使臣分五等。一等綵段五表裏絹四疋。二等四表裏絹三疋。三等三表裏絹二疋。四等二表裏絹一疋。布一疋。五等一表裏絹一疋。俱紵絲衣一套。靴鞵各一雙。存留甘州男人人等有進貢者。照五等例賞。無者每人絹布各一疋。奏事到京使臣不分等第。每人綵段二表裏絹一疋。紵絲衣一套。靴鞵各一雙。十二年奏准寄住苦峪城使臣賞例。仍分五等。比前表裏絹各減其一。不與衣服靴鞵。存留甘州有進貢者。照前五等例。無者與絹一疋。嘉靖四十三年。到京正使從人名色。照四等例賞。隆慶五年。照五等例賞。寄住甘州有進貢者。俱與綵段一表裏。不與衣服靴鞵。○回賜大馬。每匹綵段四表裏。達馬。不分等第。每匹二表裏。駝。每隻四表裏。駝羔。每隻紵絲一疋。絹二疋。倒死駝。絹六疋。折鈔絹一疋。鎖服。每段絹六疋。金剛鑽。上等。每顆絹四疋。成化十年。金剛鑽。二等。每顆絹二疋。三等。每顆絹一疋。四等。每二顆絹一疋。五等。每顆布一疋。番砂。水晶石。不與價。弘治三年。奏定。



價例。玉石。每斤絹一疋。夾玉石。四斤絹一疋。速  
來蠻石。二斤絹一疋。青金石。一斤絹一疋。把咱  
石。十斤絹一疋。螺子石。六塊絹一疋。松都魯石。  
即水舊例每斤鈔十五貫。正統四年。添作一百  
貫。每二百貫。折絹二疋。石頭靶八箇。礮砂八斤。  
各絹一疋。魚牙靶小刀。每把絹二疋。鑲鐵大刀。  
每把絹五疋。拐棍刀。每把絹五疋。兩刃劍。每把  
絹八疋。鑲鐵銼一把。鑲鐵鏡一面。各絹二疋。鑲  
鐵二斤。絹一疋。撒哈刺馬黑瞞。每段各絹九疋。  
刀紬。番名黃馬海牙兒每段絹一疋。馬服屯。即番夏布每二

段絹一疋。虎力麻。五疋。絹二疋。藍花手巾。二條。  
絹一疋。拶馥蘭。每斤絹四疋。硝子阿思馬亦。一  
箇。絹一疋。硝子遮眼。番名矮納三箇。絹一疋。蛤蚧。四  
箇。絹二疋。梧桐鱓。十斤。雌黃。十五斤。各絹一疋。  
蛇角。二枝。一表裏。羚羊角。四斤。絹一疋。豹皮。即舍  
列孫二張。綵段。一表裏。金線豹皮。一張。一表裏。  
獅子皮。一張。二表裏。哈刺虎刺皮。一張。一表裏。  
鐵角皮。二條。絹一疋。銀鼠皮。六箇。貂鼠皮。三箇。  
青鼠皮。二十箇。白兔皮。三箇。白狐皮。一張。駝皮。  
獺皮。每一箇。各絹一疋。牝馬尺。即羊皮五張。絹二



疋。卜刺硠兒皮。即牛皮四張。絹一疋。哈刺卜花。二

十張。絹一疋。樺皮弓。一張。絹八疋。回回木梳。細

者六箇。絹一疋。粗者十箇。絹一疋。珊瑚珠。正統

中。每十四兩。絹四疋。今每兩。絹二疋。鎖鎖葡萄

每斤。絹一疋。使臣自進中等馬。每匹紵絲一疋。

絹八疋。折鈔絹二疋。下等馬。每匹紵絲一疋。絹

七疋。折鈔絹一疋。新生馬駒。中途倒死馬。每匹

絹三疋。駝。每隻三表裏。絹四疋。帶進西馬。每匹

五表裏。阿魯骨馬。每匹六表裏。○求討。正統四

年。忠順王奏討。與紵絲四表裏。天順四年。王母

差來使臣。領去厚榜紙。中夾紙。各三百張。心紅

三斤。金箔一百帖。胡椒。葦菱。各十斤。桐油十斤。

白礬十斤。丁香。乳香。檀香。各三斤。良薑。桂皮。各

五斤。細茶三十斤。洗面銅盆一箇。成化十二年。

苦峪城使臣奏討。加絹一疋。十三年。又准加折

衣絹一疋。十五年。再加絹一疋。○使臣進貢到

京者。每人許買食茶五十斤。青花瓷器五十副。

銅錫湯瓶五箇。各色紗羅綾段各十五疋。絹三

十疋。三梭綿布夏布各三十疋。綿花三十斤。花

毯二條。紙馬三百張。顏料五斤。果品沙糖乾薑



各三十斤。藥餌三十斤。烏梅三十斤。皂白礬十斤。不許過多。就館中開市五日。除違禁之物。并鞍轡刀箭外。其餘段疋紗羅等項。不係黃紫顏色。龍鳳花樣者。許官民各色鋪行人等。持貨入館。兩平交易。該城兵馬司差人密切關防。及令通事管束。毋得縱容鋪戶夷人在外私自交易。如有將違禁等物。及通事人等故違者。許各該委官體察通行拏問。後又奏准。未領賞前開市二日。領賞後開市三日。其奏討沿途收買牛羊鐵鍋犁鐮者。聽於臨洮府蘭州地方與軍民兩平收買。不許過多。仍令伴送人員。及所在官司防範。不許將熟鐵兵器夾賣。及因而生事擾人。哈烈等三十八國。及天方國。日落國。各賞例與哈密同。

安定衛。洪武七年。安定王來朝貢。賜織金文綺四疋。其貢賜賞例。到京國師。綵段四表裏。絹二疋。紵絲僧衣一套。舍人并使臣。每人二表裏。紵絲衣一套。僧人。每人一表裏。紵絲番僧衣一套。靴鞵各一雙。○回賜。自進并帶進駝。每隻綵段三表裏。絹四疋。馬。每匹二表裏。○襲封。洪武八



年。賜嗣王

勅書誥命各一道。織金紵絲衣一套。綵段六表裏。諭祭已故王。祭文一道。降香一炷。新鈔一千貫。禮部差通事一員。送請封人至西寧衛交割。本衛差頭目一員。齋封物同原來人前去本地授封。別差頭目一員。齋祭物。另辦齋糧五十石。麻布五十疋。食茶二百斤。量帶軍士同去行祭。

罕東赤斤蒙古水樂二年。賞賜差來都指揮。指揮綵段三表裏。織金紵絲衣一套。靴鞵各一雙。千百戶。鎮撫綵段二表裏。舍人。一表裏。俱與素

紵絲衣一套。靴鞵各一雙。存留甘州男婦有進貢者。綵段一表裏。生絹一疋。無者。生絹一疋。布一疋。○回賜帶進駝。每隻綵段四表裏。中等馬。每匹二表裏。下等馬。每匹紵絲一疋。生絹四疋。自進中等馬。每匹紵絲一疋。生絹八疋。下等馬。每匹紵絲一疋。生絹四疋。

土魯番使臣到京。并存留賞賜。自進并帶進駝馬等物。回賜。及賣買。俱照哈密例。嘉靖二年。瑪瑙數珠一串。與絹四疋。紅絹道布一疋。絹六疋。鞍子一面。絹四疋。撒袋一副。絹二疋。其鑲鐵銼



多不真正。每貢不過百把。每二把與絹一疋。三十三年。進貢回回青三百三十一斤八兩。會估每斤與銀二兩。三十八年題准。五地面自進并帶進過各番王頭目馬匹。阿刺骨。上等每匹綵段六表裏。中等每匹綵段三表裏。下等每匹綵段一表裏。達馬。中等每匹紵絲一疋。絹八疋。折鈔絹二疋。下等每匹紵絲一疋。絹七疋。折鈔絹一疋。上等達馬。原無賞例。比照中等達馬賞例外。每匹量加生絹一疋。四十二年。進獅子每隻綵段八表裏。○各地面夷使。除正進方物給賞

外。其隨身帶有刀銼等物。邊官不能阻回。要行復進者。嘉靖十六年題准。禮部驗揀堪用者。量與進收。裁減賞例。每小刀一把。止與絹一疋。銼十把。內五把賞絹二疋。五把折鈔八十貫。各色漿水玉。每一斤八兩與絹一疋。其或所進方物原無賞例者。本部行取宛大二縣鋪行。驗估價值。斟酌給賞。○各地面夷使。求討織金段子等物。正德十六年題准。該邊鎮巡等官轉奏題請。於每名下量點一二給與。若夷人到京。自行奏討。不由鎮巡官轉奏者。不行。



撒馬兒罕。洪武間進貢。各賞銀并紵絲表裏衣服等物。正統以前賞例優厚。成化間定。王。紵絲十五疋。羅三疋。紗三十疋。熟絹十五疋。白氎絲十疋。白將樂布十疋。洗白布五十疋。紵絲帽一頂。硃紅漆戲金椀八箇。王妻。紵絲八疋。羅二疋。紗二疋。熟絹八疋。白氎絲五疋。白將樂布五疋。洗白布二十疋。到京使臣。并存留甘州男婦俱分別等第。照哈密賞例。○回賜。正統四年。金線豹一隻。綵段八表裏。西馬每匹五表裏。折鈔絹十疋。獅子皮一張。二表裏。金線豹皮每張一表裏。成化十九年。進獅子二隻。每隻比金線豹例加綵段五表裏。弘治三年。獅子一隻。綵段八表裏。正副使并送養人。止正賞。無加賞。王止與回賜。無特賜。正德三年。貢水晶椀一箇。估值銀八兩。令給絹與之。每絹一疋作銀一兩四錢。嘉靖二年議定。上等玉石每斤絹三疋。中等每斤絹二疋。下等每斤絹一疋。

魯迷嘉靖五年賞例。與撒馬兒罕同。

西番烏思藏。洪武永樂以來。給賜不等。復定刺麻番僧人等。從四川起送來者。到京每人綵段



一表裏紵絲衣一套俱本色留邊賞同其綵段  
一表裏折闊生絹四疋。紵絲衣一套內二件給  
本色衣一件。折生絹三疋。俱賞鈔五十錠。折靴  
鞮鈔五十錠。食茶六十斤。從洮河州起送來者  
到京每人折衣綵段一表裏。後加一表裏紵絲并綾  
貼裏衣二件。留邊賞同。其綵段一表裏。折生絹  
四疋。俱食茶五十斤。靴鞮鈔五十錠。進過給軍  
中等馬。每匹紵絲一疋。鈔三百錠。氍毹等物。例  
不給價。帶進方物。回賜綵段四表裏。○凡各番  
違例多差人數。每人減絹二疋。或一疋。或三疋。  
或減綾貼裏衣。正德以後。二法王違例進貢多  
至千人。並從減賞。到京者。綵段一表裏。留邊者  
絹三疋。○嘉靖六年題准。烏思藏。長河西。朶甘  
思董卜。韓胡。金川。雜谷。達思蠻。加渴瓦寺。松潘  
洮岷等處番人。番僧。正賞折衣綵段俱與一疋  
折給。有進馬者。計馬數與折。○賜封禮部行吏  
部請給

誥命。

內府各衙門關造錦二段。紵絲十表裏。袈裟僧衣  
一套。高頂僧帽一頂。水晶數珠一串。響鈸二副。



鈴杵二副。白瓷茶鍾二箇。滿答刺一箇。連帶鸞帶一條。靴鞵各一雙。食茶一百斤。檀香一炷。請勅令大慈恩寺推刺麻二人為正副使。帶領刺麻十名。同原來請封刺麻齋奉前去番地授封。差通事一員。伴送至四川布政司交割。從黎州。或天全出境。差去正副使每人賞鈔八十錠。刺麻六十錠。俱與番僧衣一套。靴鞵各一雙。贊善王授封。從陝西洮州出境。闡化等三王從四川出境。成化五年。授封闡化輔教二王。差去正使人等。自帶買路物件。食茶二萬五千斤。紵絲三百

疋。羅一百疋。絹一千疋。青紅布三千五百疋。金箔一萬貼。胡椒一百斤。十六年。賞授封闡化王回還刺麻覺義等三十員名。正使禪師覺義每人鈔八十錠。綵段三表裏。絹二疋。副使都綱鈔六十錠。二表裏。差去刺麻每名鈔四十錠。一表裏。俱與紵絲番僧衣一套。靴鞵各一雙。帶去徒衆每人鈔二十錠。一表裏。進過氍毹等物。不給價。

長河西。正統初。賞賜宣慰司自來進貢者。宣慰使鈔一百五十錠。綵段四表裏。指揮僉事鈔一



百錠。綵段二表裏。俱紵絲衣一套。靴鞮各一雙。襲職進貢。賞同國師并國師姪男進貢到京者。照宣慰使例。都綱刺麻番僧人等進貢到京者。每人鈔五十錠。綵段一表裏。紵絲番僧衣一套。靴鞮各一雙。食茶六十斤。留邊賞同。五年刺麻番僧進馬到京。每人鈔五十錠。綵段一表裏。折衣綵段二表裏。靴鞮各一雙。進過馬。不分等第。每匹鈔一百錠。十年長河西招撫生番。照本處進貢番僧例。每人賞鈔五十錠。綵段一表裏。折衣綵段二表裏。靴鞮各一雙。仍加賞折衣綵段

一表裏。景泰四年。每人鈔五十錠。綵段一表裏。不與衣服靴鞮。天順元年。照舊給賞。三年。尊勝寺國師護印帶進舍利等物。照先年烏思藏地方都指揮使等事例。量給綵段二表裏。成化初。番僧人等到京。每人闊生絹二疋。鈔五十錠。折靴鞮鈔五十錠。折衣綵段二表裏。留邊賞同。其折衣綵段內。一表裏折闊生絹四疋。氍毹等物。例不給價。帶進國師方物。給賜綵段二表裏。十二年。番人番僧九百名來貢。以無勘合到京。并留邊者。每人俱減絹二疋。弘治二年。留邊者減



三疋○貢回市茶弘治十四年題准刺思岡尊勝等寺寨到京番僧每人許買食茶二百斤嘉靖二十二年題准如董卜韓胡例

朶甘思天順七年宣慰使進貢到京賞鈔一百五十錠綵段四表裏紵絲衣一套靴鞮各一雙其貢使賞例禪師番僧人等到京每人賞鈔五十錠綵段一表裏紵絲衣一套留邊每人鈔五十錠折表裏闊生絹四疋紵絲衣一套內二件給本色衣一件折闊生絹三疋俱與折靴鞮鈔五十錠食茶六十斤糴糴等物例不給價指揮

僉事例加絹四疋國師比禪師加絹二疋新招撫來貢者到京每人鈔五十錠絹二疋折衣綵段二表裏留邊每人鈔五十錠絹二疋折衣綵段一表裏闊生絹四疋各折靴鞮鈔五十錠方物俱不給價弘治十七年以人數過多惟進貢及已賞未襲職再來到京者全賞其留邊者每人減絹二疋

董卜韓胡差來國師禪師都綱道官刺麻番僧頭目寨官人等到京每人綵段一表裏留邊每人折表裏闊生絹四疋俱與折鈔絹二疋靴鞮



鈔五十錠。番僧每人紵絲綾貼裏僧衣一套。頭目人等每人紵絲綾貼裏俗衣一套。氍毹等物例不給價。○回賜土官綵段十表裏。妻綵段四表裏。嘉靖二年。以差來人數過多。惟正額到京者。全賞。其留邊應給折鈔絹二疋。令與絹一疋。鈔十錠。三年。減原給折表裏絹三疋。○貢回市茶。嘉靖八年題准。到京并留邊番僧每人許自買食茶一百斤。行移右府出給勘合。填寫人數。茶斤仍行湖廣布政司。著落該府。許令照數收買。自雇船隻載回。沿途關隘驗放出境。如有夾

帶。就彼盤驗入官。

加渴瓦等寺。刺麻番僧頭目寨首到京。每人綵段一表裏。折衣二表裏。留邊賞同。折衣每一表裏。與絹四疋。俱賞鈔六十錠。折靴鞮鈔五十錠。氍毹等物。不給價。

金川寺進貢刺麻番僧到京。每人賞綵段一表裏。折衣綵段二表裏。留邊每人綵段一表裏。其折衣綵段二表裏。內一表裏折生絹四疋。一表裏折食茶一百斤。俱與鈔六十錠。折靴鞮鈔五十錠。氍毹等物。不給價。弘治十七年。以人數過



多。惟年例進貢及襲職到京者全賞。其留邊應給折衣絹。每人減三疋。

雜谷安撫司。與金川寺例同。弘治十七年。留邊每人減折衣絹二疋。嘉靖六年。照舊給賞。每人量加食茶二十五斤。其所屬上草坡克州等寺寨。嘉靖六年題准。留邊番僧每人減絹三疋。加食茶二十五斤。

打喇兒寨番僧到京。每人綵段一表裏。內一疋。給價銀三兩。折衣綵段二表裏。與本色。留邊每人綵段一表裏。內一疋。如前給價。折衣綵段二

表裏。每一表裏折給闊生絹四疋。共八疋。俱賞鈔六十錠。折靴鞢鈔五十錠。方物例不給價。

達思蠻長官司。正統中。進貢到京。并留邊番僧人等。每人鈔四十錠。綵段一表裏。折衣二表裏。靴鞞各一雙。弘治二年。照前賞例。各減折衣一表裏。留邊折衣。與生絹四疋。靴鞞俱折鈔十錠。長寧及韓胡碉。由松潘起送。番僧賞例。與達思蠻同。其松潘茂州等處。進貢到京。馬每匹賞鈔一百錠。鐵甲。氍毹等物。不給價。

陝西洮岷等處。番僧到京。并存留。每人賞折衣



綵段一表裏折靴鞮鈔五十錠馬每匹紵絲一疋鈔三百錠上等馬加絹一疋駝每隻綵段三表裏絹四疋內瞿曇寺到京禪師加番僧衣一套不由所在官司給文起送私自來京謝

恩等項進貢者止給馬駝價不賞嘉靖十七年慧濟扯巴寺番僧進貢到京八名每名綵段一表裏折衣綵段一表裏留邊七名每名折衣綵段一表裏折與闊生絹四疋俱各與綾貼裏衣二件靴鞮鈔五十錠食茶五十斤進過馬每匹紵絲一疋鈔三百錠方物例不給賞二十七年到京

并留邊加至一百八十七名以人數過多議將到京十五名照例給賞留邊六十七名照洮州番僧例每人賞折衣綵段一表裏折靴鞮鈔五十錠食茶五十斤其新增一百五名每名給與闊生絹二疋食茶四十斤進過馬匹照前給賞經該起送官員以違例參治

洮岷等處番族到京并存留番人每人賞綵段二表裏絹二疋鈔二十錠折靴鞮鈔五十錠進馬每匹紵絲一疋鈔三百錠盔甲腰刀例不給賞嘉靖六年奏准折衣綵段并馬價綵段每疋



折銀三兩以上俱許開市三日

大明會典卷之一百十二

大明會典卷之一百十三

禮部七十一

給賜四

土官

雲南徼外土官進到象馬金銀器皿寶石等件  
例不給價其賜例各不同

車里給賜宣慰使錦二段紵絲紗羅各四疋  
妻紵絲羅各三疋差來頭目每人紵絲紗羅  
各四疋折鈔絹二疋布一疋通事每人綵段  
一表裏折鈔絹一疋俱與羅衣一套象奴從  
人每人折鈔綿布一疋絹衣一套俱與靴襪



各一雙

木邦給賜宣慰使錦二段紵絲紗羅各三疋。妻紵絲羅各二疋。差來陶孟每人紵絲紗羅各三疋。折鈔絹二疋。布一疋。招剛每人紵絲紗羅各二疋。折鈔絹二疋。通事每人綵段一表裏折鈔絹一疋。俱與羅衣一套。象奴從人每人折鈔綿布一疋。絹衣一套。俱與靴鞵各一雙。

緬甸給賜宣慰使錦二段。紵絲紗羅各三疋。妻紵絲羅各三疋。差來頭目每人紵絲羅各

三疋。紗二疋。鈔六十錠。招剛每人紵絲羅各二疋。紗一疋。鈔四十錠。俱與羅衣一套。通事鈔三十錠。象奴從人每人鈔十五錠。俱與絹衣一套。靴鞵各一雙。

老撾并八百。賜例俱與車里同。但通事羅衣改紵絲衣。

孟養給賜孟養思六及妻與車里同。差來陶孟每人紵絲羅各四疋。紗二疋。折鈔絹二疋。綿布二疋。招剛每人紵絲羅三疋。紗二疋。折鈔絹一疋。綿布一疋。招八每人紵絲紗羅各



一疋。折鈔絹一疋。通事每人紵絲一表裏折鈔絹一疋。各與紵絲衣一套。象奴每人折鈔綿布一疋。絹衣一套。俱與靴鞵各一雙。進過馬每匹絹五疋。

孟密給賜女土官及其子安撫俱紵絲紗羅各三疋。安撫妻紵絲羅各二疋。差來頭目陶孟招剛通事象奴從人賞例與木邦同。

孟璉給賜土官紵絲紗三疋。羅二疋。絹四疋。妻紵絲羅各二疋。差來頭目舍人每人綵段二表裏羅衣一套。通事鈔二十錠。絹衣一套。

從人每人鈔十五錠。絹衣一套。俱與靴鞵各一雙。

孟良給賜土官舍人紵絲紗羅各二疋。差來頭目紵絲羅各二疋。紗一疋。折鈔絹一疋。通事每人折鈔絹一疋。俱與羅衣一套。從人每人折鈔綿布一疋。絹衣一套。俱與靴鞵各一雙。

鄧川州賜例與孟璉同。象奴賞與從人同。湖廣廣西四川雲南貴州腹裏土官朝覲進到方物及中途倒死馬匹例不給價。到京馬匹每



匹賜鈔一百錠。其賜各不同。

凡三品四品回賜鈔一百錠。綵段三表裏。惟播

州貴州二宣慰使賜五品鈔八十錠。綵段三

表裏。六品七品鈔六十錠。綵段二表裏。八品

九品鈔五十錠。綵段一表裏。雜職衙門并頭

目人等自進馬匹方物鈔四十錠。綵段一表

裏。弘治十四年瓊州崖州起送土官每○差

來通事把事頭目各鈔二十錠。綵段一表裏。

隨來土官弟男并把事頭目人等鈔二十錠。

從人伴吏鈔十錠。播州差來長官鈔四十錠。

鈔三十錠。貴州差來舍人鈔二百五十錠。綵段一表裏。把事十五錠。一表裏。通事十錠。綵段一足。頭目從人賞鈔如例。

凡進馬一二匹及方物輕者止照雜職例賞。

嘉靖元年奏准朝覲到京以馬數多寡為差。

進馬一二匹者准一人作差來名色賞鈔二

十錠。綵段一表裏。三四匹者作二人。五六匹

者作三人。綵段鈔錠照數遞加○二年題准。

若所差係土官弟姪兒男進馬四匹以上與

方物重者照舊例以衙門品級高下為差。其

馬少物輕者照雜職例。若所差係通把頭目



人等照新例。以馬數方物多寡為差。凡到京過期減半給賞。弘治三年以後。正月內到者亦全賞。二月到者減半。該賞半表裏者。折與闊生絹二疋。○隆慶五年題准。過期半年以上。不給賞。

凡謝恩差來人。與雜職賞同。貴州土官減鈔二十錠。隨來通把從人。給鈔如朝覲例。

凡慶賀貴州差來舍人。賞鈔五十錠。綵段二表裏。把事鈔十五錠。綵段一表裏。通事從人鈔如朝覲例。四川土官差來人進馬者。鈔二十錠。綵段一表裏。進降香茶蠟等物者。鈔二十錠。絹二疋。隨來人。鈔十錠。

**給賜番夷通例**

凡給賞段絹等物。萬曆六年題准。各織造去處。撫按官痛革尅減。冒破奸弊。有仍將粗惡不堪之物解進。該部科將撫按等官一體查叅。其給賜衣服靴襪等件。該衙門成造務要精好。如有不堪聽禮部。其實叅奏重治。其留邊給賞齎去人員。有將賞物抵換勒捐者。督撫官查叅重治。至於各夷所得賜物。不許於開市之日貨賣。或



願折價禮部題照原價折給

凡齎發貢夷賞賜萬曆七年題准各貢夷慶賀事完即行頒給賞賜齎發回還毋令稽留久住致惹事端○又議准每夷人到館該館官先將各夷數目一體報知戶工衙門該司一面知會內府衙門俱各預為整理賜物候禮部咨文到日即照數檢點及回咨掛號各須上緊定限半月以裏通行關領禮部一面題給一面知會兵部查發勘合速令起程其該邊奏報并禮部題行各衙門關領日期即于散賞奏內題知以便稽

考

凡賜物折價嘉靖六年議准女直夷人及番僧番人給賜綵段自願折銀者織金每疋折給銀三兩八錢素者三兩五錢○隆慶三年議准西番貢夷全賞者禮部照例分別題請頒給減賞者每名給銀三兩絹二疋每疋折銀三錢於本布政司庫貯銀內支給○萬曆六年題准各夷來京應賞人數凡折衣折段銀兩行工部俱給以見貯銀兩不必轉行該省其支茶勘合及在邊半賞人數銀兩禮部先咨巡撫衙門轉行布



政司仍另給夷人為照待到日將夷人領去勘合與禮部先發咨文對同方准支給其存留在邊全賞人數銀兩禮部驗封明白亦咨巡撫衙門與夷人所執公文查對相同給發仍將各項銀段及食茶數目行都督府填入過關勘合以便互校差去通事官令守取巡撫回咨備開散過齋去存留銀段若干支過食茶及半賞銀兩若干以免誑騙沈匿等弊如咨內數目不合及無回咨將通事從重叅問

凡貢夷病故在中途者例不給賞萬曆六年題  
准各鎮清查病故夷人賞物留充下年給賞之數

凡投降夷人每名賞素紵絲衣一套綿布十疋鈔一百錠米三石牛二隻羊五隻柴五百斤隨來婦人每口綿布三疋鈔十錠

凡入官貨物洪武二十六年定凡遠夷之人或有長行頭匹及諸般物貨不係貢獻之數附帶到京願入官者照依官例具奏關給鈔錠酬其價值○弘治間定凡番國進貢內國王王妃及使臣人等附至貨物以十分為率五分抽分入



官五分給還價值必以錢鈔相兼國王王妃錢  
六分鈔四分使臣人等錢四分鈔六分又以物  
折還如鈔一百貫銅錢五串九十五貫折物以  
次加增皆如其數如奉

旨特免抽分者不為例○凡番國進貢船內搜出私  
貨照例入官俱不給價其奉

旨給與者不為例

凡番貨價值弘治間定回回并番使人等進貢  
寶石等項

內府估驗定價例赤金每兩直鈔五十貫足色銀

每兩十五貫錫每斤五百文琉球鐵每斤三百

文腰刀每把三貫番弓每張二貫番箭每枝一

百文鶴頂每箇一貫玳瑁盒每箇一貫玳瑁盃

每箇一貫珊瑚枝每斤三十貫珊瑚珠每兩二

貫大玻璃瓶碗每箇三貫小玻璃瓶碗每箇二

貫玻璃燈甌每箇二貫粟米珠每兩五貫象牙

每斤五百文暹羅翠毛每斤三百文古刺木內

大合一貫小合五百文回回石青每斤一貫烏

爹泥每斤五百文油血石每兩二貫番砂每斤

二百文膽礬每斤二貫安剔牙每斤一貫黃蠟



每斤五百文。雄黃每斤五百文。阿魏每斤二貫。

華菱每斤二貫。沒藥每斤五貫。滿刺加肉苣菘

每斤五百文。暹羅白荳荳蔻花每斤五百文。華

澄茄每斤一貫。悶蟲藥每斤二百文。大楓子每

斤一百文。暹羅木鱉子每斤三百文。血竭每斤

一十五貫。龍涎每兩三貫。蘇合油每斤三貫。乳

香每斤五貫。暹羅四沈香每斤三貫。速香每斤

二貫。丁香每斤一貫。木香每斤三貫。金銀香每

斤五百文。降真香每斤五百文。暹羅黃熟香每

斤一貫。暹羅安息香每斤五百文。梔子花每斤

一貫。丁皮每斤五百文。暹羅蘇木每斤五百文。

琉球十貫烏木每斤五百文。暹羅紫檀

木每斤五百文。胡椒每斤三貫。琉球三十貫暹

刺加二鹽每斤一百文。藤竭裏襄每斤一貫。夕

牙吸荅納每斤五百文。八的阿納每斤四百文。

三額阿刺必每斤五百文。別模刺每斤五百文。

厥枯露每斤二百文。加定每斤五百文。哈都味

思每斤五百文。阿思模達塗兒氣每斤五百文。

蘇麻達每斤二百文。花氈單每條一十貫。大花

手巾每條二貫。小花手巾每條一貫。絲手巾每



條二貫。紅紋節知被。每條五貫。苾布。每疋一十  
五貫。撒哈刺。每疋一百貫。兜羅布。每段一十貫。  
油紅布。每段一貫五百文。青布。每段一貫五百  
文。花布。每段一貫。暗花打布。每段一貫。沙連布。  
每段一貫。青查禮布。每段一貫。加籠宜布。每段  
一貫。烏連布。每段一貫。勿那朱布。每段一貫。各

樣麤布。每段一貫。

日本國附進刀劍。每把鈔三

鈔一百貫。該絹一疋。其名檀香。每十斤。銀一  
兩。折錢七百文。暹羅滿刺加檀香。每斤鈔  
十貫。暹羅藤黃。每斤鈔十五貫。紫莖。每斤鈔  
三十貫。琉球暹羅滿刺加。每鈔二百貫。折絹  
一疋。

凡折還物價。弘治間定。各色紵絲。每疋折鈔五  
百貫。各色綾子。每疋三百貫。各色紗。每疋三百  
貫。各色絹。每疋一百貫。青絨毯子。每疋六百貫。  
駝褐毯子。每疋六百貫。青花白瓷盤。每箇五百  
貫。椀。每箇三百貫。瓶。每箇五百貫。酒海。每箇一  
千五百貫。豆青瓷盤。每箇一百五十貫。椀。每箇  
一百貫。瓶。每箇一百五十貫。麝香。每斤一千五  
百貫。樟腦。每斤一百貫。良薑。每斤二十五貫。大  
黃。每斤三十貫。鐵鍋。三尺闊面。每口一百五十  
貫。



歲進

舊例歲進茶芽及木瓜藥材俱從土產去處起解轉送該衙門供用各有定數其後又有川扇及諸時鮮等物

茶芽

各處歲進茶芽弘治十三年奏准俱限穀雨後十日差解赴部送光祿寺交收違限一月以上送問雖有公文不與准理

計茶芽四千斤內一百二十斤南京納直隸五百斤

常州府宜興縣一百斤內二十斤南京禮部納限四十六日

廬州府六安州三百斤限二十五日

廣德州七十五斤建平縣二十五斤限四十六日

浙江五百斤

湖州府長興縣三十斤南京納

紹興府嵊縣八斤會稽縣三十二斤限五十

五日

温州府永嘉縣一十斤樂清縣一十斤限七



十七日

杭州府臨安縣二十斤。富陽縣二十斤。限五

十二日

寧波府慈谿縣二百六十斤。限六十一日

處州府麗水縣一十五斤。縉雲縣六斤。青田縣六斤。遂昌縣六斤。限七十日

金華府金華等縣共二十二斤。限六十四日

衢州府龍游等縣共二十斤。限六十七日

台州府臨海等縣共一十五斤。限七十一日

嚴州府建德縣五斤。淳安縣四斤。遂安縣三

斤。壽昌縣三斤。桐廬縣二斤。分水縣一斤。

限五十八日

江西四百五十斤

南昌府七十五斤。限六十日

南康府二十五斤。限五十一日

贛州府一十一斤。限八十三日

袁州府一十八斤。限七十九日

臨江府四十七斤。限六十五日

九江府一百二十斤。限五十五日

瑞州府三十斤。限六十四日



建昌府二十三斤。限七十五日

撫州府二十四斤。限七十三日

吉安府一十八斤。限七十一日

廣信府二十二斤。限七十五日

饒州府二十七斤。限六十一日

南安府一十斤。限九十日

湖廣二百斤。內十八斤。南京納

武昌府興國州六十斤。限五十四日

岳州府臨湘縣十六斤。限七十一日

寶慶府武崗州二十四斤。邵陽縣二十斤。新

化縣十八斤。限五十九日

長沙府安化縣二十二斤。寧鄉縣二十斤。益

陽縣二十斤。限八十一日

福建二千三百五十斤。內五十二斤。南京納

建寧府建安縣一千三百六十斤。內探春二

十七斤。先春六百四十三斤。次春二百六

十二斤。紫笋二百二十七斤。薦新二百一

斤。崇安縣九百九十斤。內探春三十二斤。

先春三百八十斤。次春一百五十斤。薦新

四百二十八斤。限七十八日



木瓜

直隸寧國府宣城縣歲進木瓜二千三百箇。內上瓜一千八百箇。中瓜五百箇。

藥材

廣西思明府歲進解毒藥五方三十四味。共三十八斤。內錦地蘿一味。重二斤。消食藥十味。重十二斤。消毒藥十八味。重十九斤。大衝藥一味。重一斤。塞住藥四味。重四斤。

四川成都府歲進藥材七味。內天雄二十對。附子五十對。川烏三十對。漏藍二十斤。仙茅二十一斤。補骨脂十五斤。巴豆四斤。

黃魚

浙江嘉興府歲進黃魚三百尾。俱行乍浦河泊所。小滿時節採捕。沿途換冰。接收到京。通政使司投本。尚膳監交收。禮部批廻。

魚鮓

湖廣布政司歲進鱒魚鯉魚鮓各四桶。糟鮓魚編魚各四桶。醬子鮓一十二桶。乾鯉魚五十斤。鱒魚筋并面肉四十把。鱒魚鮓各十桶。醬筒并代鎮守衙門原進鱒魚鯉魚鮓各十桶。醬



子鮓二十桶。俱行武漢黃岳常沔六府州造辦。咨呈禮部轉送光祿寺交收。禮部批廻。

### 川扇

四川布政司造。撫臣奏進。歲例扇一萬一千五百四十把。嘉靖三十年。加造備用扇二千一百把。四十三年。又加造小式細巧扇八百把。共一萬四千四百四十把。初起鎮守中官。後以為常。

又

蜀王府別有奏進

大明會典卷之一百十三





